

Ўзбекистон Республикаси Мустақиллик куни — 1991 йил 1 сентябрдан чиқа бошлаган

Муассислар: Ўзбекистон Республикаси Хотин-қизлар кўмитаси, Болалар жамғармаси ва «Соғлом авлод учун» Халқаро жамғармаси

БАХТ БИЛАН УЧРАШУВ



Ахил, бахтли, оилалар ҳақида эшитсам ҳамisha кувонаман. Бу галгиси ҳам шундай бўлди. Гиждуннинг олис Кўкработ қишлоғида бир файзли оилада бўлдим. Бу уйнинг икита қарияси бор: биринчиси - 96 ёшли Шариф бобо Эшматов, иккинчиси - 200 ёшли тут дарахти... Шариповлар хонадонининг эркатой ўғлини Аҳаджон бир суҳбатда уйдаги тут дарахти ҳақида гапирган эди. Ҳамқишлоқлари уни турон тутти деб номлаган экан. Шу-шу машҳур кекса тутни кўришга кизикиб қолдим...

Борганимда Шариф бобонинг фарзандлари йиғилган кун экан. Бу, одатдаги дам олиш кунларининг бири - яқшанба эди. Бирин-кетин ўғил-қиз, неваракелинлар йиғила бошлашди. Негадир бобо безовта, гоҳ-гоҳида дарвоза томонга қараб-қараб кўядилар.

Кўз кувонадиган ўғил-қизлар, неваралари бобо билан кўришиб, дўсисини олиб туришибди.

- Нима учун отангиз безовталар? - дея сўрайман астагина Аҳаджондан.

- Ота ота-да, узоқдагисини кутаяптилар, - деди у киши жумбоқди тарзда.

Бироз вақт ўтгач, Шариф бобомизнинг сабрлари чидамади, ахйир ёрилдилар.

- Соатгинам келолмади-я, айтмовдингларми уни?

- Отажон, ахир уйимизда тўй бўлаётгани йўқ-ку, нима деб чақирамиз уни, узоқ йўл бўлса... - кимдир ўзича тушунтиришга уринди. Бобо жимгина тикилиб қолдилар. Мен чалгитиш ниётида:

- Шариф бобо, Соатгинам деб кимни айтаяпсиз? - дея сўрайман.

- Келин-куёвларни гоҳида қулдириб, гоҳида уялтириб, саволлар берадиган ўғлимни-да, нима, танимайсизми уни? - бобо астойдил жавоб берадилар. - У ҳам сиздек Тошқанда туради...

- Э, телевидениедаги «Келин-куёв» кўрсатувининг муаллифи ва бошловчиси Соат Шарипов менинг ўғлим денг, танийман уни, танийман...

Узоқдаги ўғилдан гап очилганига отанинг чеҳралари ёришиб:

- Булар нимани билишарди, - дея фарзандлари томонга ишора қилдилар, - болаларим йиғилган кун мен учун тўй-да! Тўй дегани бундан ортқ бўладими? Бугун ҳаммаси келолмади, кўриб турган-

ларингиз ярмиси. Худога шукр, илоҳим менинг ёшимга киришсин, фарзандларининг роҳатини кўришсин. Сизга ҳам шу ниётим юксин, болам, омин...

Эзгу-ният, дуолар таъсириданми хаёлга толасан киши. Бахтли оилалар остонасига қадам қўйсанг, бутунлай бошқа бир оламга тушиб қолгандек бўласан. Атрофингни кучқудрат, бутунлик, ҳавас қуршайди.

- Ҳавас қилса, астойдил талпинса, Аллоҳ берар экан, болам шукр... - Шариф бобо жуда оҳиста, гўё ўз ўзларига гапирётгандек сўзлайдилар. Ахир, 96 ёш ҳазилакам умр эмас. Бунинг устига Шариф ота умрини дала-дашда меҳнат билан ўтказди. Фарзандлар тарбияси - уларга ҳалол лўма топиш, едириш, кийинтириш захмати...

Булар бари айтишгагина осон. Бўйи-бўйдан ошган азамат ўғиллар, меҳрибон қизлари Аллоҳнинг марҳамати, чин ниётлари маҳсули эмасми?

Бугун Шариф бобонинг бир дунё бойлиги бор. Бугун Шариф бобонинг толган-тутгани бир ховлига сиғмайди: 6 ўғил, 3 қиз, 50 га яқин неваракелинлар, чеваралар бутун мамлакатимиз бўйлаб Шариф бобонинг номи эъозлаб, шарафга бурқаб, турли со-

ҳаларда хизмат қилишяпти.

Одатда кўпинча "Бахт нима", - деб сўрашади. Янглишмасам, шу куни чинакам бахт нима эканини англагандек бўлдим. Бахт билан учрашдим, десам хато бўлмас.

Ховли ўртасидаги Турон тутига, Шариф бобога зимдан тикилиб, ажиб бир ўхшашлик туюман. Шариф бобонинг юзидеги ажинлар, қўлларидеги узун-узун чириклар ўзига хос қариллик аломатлари тутта монанд. Уларга қараб турсанг, узоқ тарих, турли воқеа-ходисалардан сўзлаётгандек...

Ҳакимбек, Аҳад, Неъмат, Соат, Саид, Самандар ва Ҳалима, Раҳима, Роҳила Шариф бобо экан, ўстирган ниҳоллардир. Бугун чинорлар сафига қўшқўш неваралар қўшиляпти, чеваралар кўпайяпти. Янги ном, янги авлод, демакки, Шариф бобонинг умри давом этмокда, ҳамон униб-ўсиб, меваалар бермокда.

Шу кун суҳбатимизнинг кўри, даврамизнинг тўри суюкли Шариф бобоники бўлди.

Ражаббой РАУПОВ

МАМЛАКАТИМИЗГА БЎЛГАН ИШОНЧ ЯНГИ БОСҚИЧДА

Президентимиз Германия сафари юзасидан мухбирлар билан бўлган суҳбатларида хорижий давлатларга расмий таширлар моҳиятида муҳим ўзгариш юз берганини таъкидладилар. Бу ўзгариш Ўзбекистонга, унинг очилмаган имкониятларига нисбатан чет элларда катта қизиқиш уйғота олганлигимиздадир.

Хорижий давлатлар билан иқтисодий, сиёсий ва маданий алоқаларимизнинг тобора мустаҳкамланаётгани ҳам бунда муҳим омил бўлмоқда. Давлатимиз раҳбарининг федерал президент Йоханнес Рау, федерал канцлер Герхард Шрёдер, Бундестаг раиси Волфганг Тирзе, вице канцлер, федерал ташқи ишлар вазири Йозеф Фишер, федерал ички ишлар вазири Отто Шили, федерал иқтисодиёт ва технология вазири Вернер Мюллер каби нуфузли сиёсатчилар билан уршувлари юртимизга бўлган қизиқиш ва эътиборнинг белгисидир.

Ички ишлар вазири Отто Шили билан музокара халқаро террорчилик, уюшган жиноятчилик, наркотикларнинг ноқонуний савдосига қарши курашда Германиядек нуфузли шерикка таяниш имкониятини берса, иқтисодий ҳамкорлик ва тараққиёт вазиригининг давлат котиби Эрих Штатер билан

мулоқот мамлакатимизга илғор немис технологияси кириб келиши, иқтисодий ҳамкорликнинг мустаҳкамланиши учун янада кенгроқ йўл очди.

Немис ишбилармонлари билан мулоқотлар ташир дасуторининг муҳим қисмларидан бири бўлди.

Ўзбекистонда мавжуд минерал хомашё захиралари, америкалик экспертларнинг ҳисоб-китобига қараганда 3,3 триллион АҚШ долларини ташкил этади. Ислол Каримов немис ишбилармонларига қишлоқ хўжалиги маҳсулотларини қайта ишлаш, тўқимачилик, кимё ва тоғ-кон саноати, коммуникация тармоғи бўйича ҳамкорлик қилишни таклиф этди.

Давлатимиз раҳбари Саксония федерал ерига бежиз ташир бўйида. Саксония Ўзбекистон билан Германия савдо-сотигида муҳим ўрин тутди, чунки бу алоқаларда 30-35 фоиз улш айнан мазкур федерал ер ҳиссасига тўғри келади.

Ислол Каримов "Сименс" гуруҳининг "Инфинсон" технологик Дрезден" тармок корхонаси билан танишганда: "Бу ерга томоша учун, хайратланиш учун келганимиз йўқ. Мақсад бу корхона маҳсулотини Ўзбекистонда ҳам ишлаб чиқаришни йўлга қўйиш, компанияни юқори технологиясини юртимизга кири-

тишдир", - деб алоҳида таъкидлади. Давлатимиз раҳбарининг айтишича бизда бундай махсулот ишлаб чиқариш имкониятлари кенг. Айни вақтда Ўзбекистонда бу борада керакли мутахассислар тайёрловчи махсус олий ўқув юртини бор.

Германияга ташир давомида молия, сайёҳлик, фан-техника, наркотиклар контрабандасига қарши кураш каби соҳалар бўйича ўзаро ҳамкорликни кенгайтиришга оид ўн тўртта ҳужжат имзоланди.

Сайёҳлик соҳаси бўйича имзоланган ҳужжатлар Ўзбекистонга сайёҳлар оқимини кўпайтиришда, соҳа бўйича немисларда тўпланган тажрибани ўрганишда қўл келса, молиявий ҳамкорлик соҳасидаги келишувлар қўшма лойиҳаларни амалга ошириш, кредитлар олиш имконини беради.

Халқимиз тарихида уйғониш, тараққиёт даврини бошлаб берган истиқлолнинг ўн йиллигини нишонлаш арафасида биз миллатимиз қаддини тиклаши, юртимиз жаҳоннинг ривожланган давлатлари сафидан жой олиши учун жуда кенг қўлдаги ишларни амалга ошираёلمиз. Шу нуктаи назардан Германия билан муносабатимиз юксак поғонага кўтарилиши муҳим аҳамият касб этади.

Хамдам ТҮЙЧИЕВ

«ҒАЛАБАЛАР ОЛДИНДА» ЛИГИ ЧИН БЎЛСИН

"Оила ва жамият" газетасининг доимий мухлиси-ман. Бошқа газета ва журналларга ҳам обун бўлган-ман. Ҳаммасини қолдирмай ўқиб чиқмасам кўнглим таскин топмайди. Лекин "Оила ва жамият" бошқача-да. Газетадан инсонни руҳан кучли қиладиган муҳаббат, эзгулик, тотув турмуш ҳақидаги мақола-ларни ўқиб, менимча бир донишманддан ўғит олгандай бўламан. Ушбу мақола-ларни ўқиб, яхшиларидан ўрнак оламан, баъзиларини ўқиб тавба қиламан. 2001 йил 3 январ сонидидаги футболга оид Ўзбекистон футбол федерацияси бош котиби Б. Раҳимовнинг "Ғалабалар олдидан" сарлавҳали мақо-ласини ўқиб жуда хурсанд бўлдим. Менимча бу бора-даги фикр ва мулоҳазаларимизни ёзсақ, ўзаро қиз-гин баҳслар бўлса, балки Ўзбекистон футболни ри-вожига озгина бўлса ҳам ҳиссамиз кўшилган бўлар-миди...

Лекин рост гап, ушбу мактубни ўқиб, қониқиш ҳосил қилмадим.

Мактуб муаллифи - Б. Раҳимов кейинги йилларда миллий терма жамоамизнинг халқаро мусобақаларда ўз имкониятларидан паст даражада қатнашганли-гини тан олибди-ю, терма жамоанинг барча раҳ-барларининг ишдан бўшатилганлигини мамнуният билан таъкидлади. Ахир барча раҳбарни ишдан бўшатилш билан ғалабага эришиб бўладими? Ушбу раҳбарлар орасида жонкуяр, ўз ишининг устаси, фут-болчи қалбига йўл топадиган, уни тушунлиқдан кўтарадиган, ғалаба сари чорлайдиганлари ҳам бордир. Ҳўл курак баравар ёнган шу бўлса керак-да. Бу "Бургага аччиқ қилиб кўрпа куйдириш" дега-ни эмасми? Вазиат шу даражага етмасдан раҳбар-ларни танлаш керакмиди? Менимча фақат раҳбар танлаш билан чекланмасдан, иқтидорли, қобилият-ли футболчиларни танлаш, уларни рағбатлантириш кўпроқ ғалабага интилиш бўлади.

Ўзбекистонимиз ҳудуди бепоен. Ушбу бепоен юр-тимиз чекка қишлоқларида, туманларида ўнлаб "ўзбек дурдоналари" - ўғлонларимиз футбол ола-мидан четда юришибди, улар қобилиятини рўёбга чиқарадиган ташаббускор раҳбарлар керак. Туман-ларда, айниқса қишлоқларда ёшлигидан қобилият-ти бор болаларни футболга жалб қилиш керак. Бу-нинг учун қишлоқларда ҳам спортга эътибор керак. Замонавий бўлмаса-да, салгина ўзига тортадиган ўйингоҳлар керак.

Мустақиллигимизнинг 10 йиллиги арафасида ту-рибмиз. Шу давр ичида Юртбошимиз спорт ҳақида, футбол ҳақида қанчалаб илиқ сўзлар айтди, қарор-лар чиқарди. "Ватан остонадан бошланади". Меним-ча спорт ҳам остонадан бошланади. Керак бўлса, ҳар бир уйдан иқтидорли футболчиларни топиб тар-биялаш керак. Мактабларда ҳозир ҳам икки томон-га 4 дон тошни кўйиб дарвоза ясашади. Ҳатто жа-моа хўжаликларида ҳам ўйингоҳлар ташкил қилин-маган.

Футбол ҳақида ойнаи жаҳонда, газеталарда им-кони борича футболчилар билан очик суҳбатлар ўтказиб, уларнинг фикрларини ўрганиб борилса, баъзи тўсиқлар, камчиликлар ошқора айтилса қизи-қишлар янада ортади.

Мактабларда ёш футболчиларни танлаш, уларга эътибор қилиш, уларнинг онгига футболни сингди-риш керак. Маҳоратли ёш футболчилар мактабни битириб чиқишга, ўқиш, иш, турмуш ташвишлари-га ўралашиб қолишадю, футболга бўлган иштиқ-лари сўна боради. Бундай маҳоратли болаларни топиб тарбиялаш керак. Бунинг учун футбол мута-хассислари маҳалла ва мактаблар билан боғланиб туришлари лозим.

Хуллас, Ўзбекистон футболини жаҳонга танитади-ган юлдузлар орамызда. Фақат уларни топиш, тан-лаш, футбол оламига етаклаш учун жонкуяр, мато-натли, элим деб, юртим деб тер тўқадиган фидойи мураббийлар танланса - "Ғалабалар олдидан" бўли-шига ишонч ҳосил қилар эдик.

Ўқтам САТТОРОВ

Самарқанд вилояти, Нуробод тумани, Жом қишлоғи

СОҲИБҚИРОН РУҲИ МАДАЛҚОР

Соҳибқирон Амир Темури таваллудининг 665 йиллиги муносабати билан мамлакатимизнинг турли шаҳар ва вилоятларида мазкур санага бағишланган кўнлаб тантанали, оммавий ҳамда илмий тадбирлар ўтказилмоқда.



Пойтахтимизнинг Амир Темури хиёбонида бўлган сайлга ҳарбий хизматга қақирилган ёшларнинг таклиф этилгани айни муддао бўлди.

Бу фарзандларимизни доворак, элсавару жасоратли бўлишга ундайди,- деди ҳарбий хизматга қақирилган дўмбирободлик Миржалол Тожиевнинг онаси Нафиса опа "Туркистон-пресс" муҳбирига. - Улар юзи-мизни ерга қаратмайди. Ой бориб омон келишсин.

Ёшларимиз Ватан олдидаги бурчларини ўташ ара-фасида улғ аждодимиз руҳини шод этганлари бежиз эмас. Бўлғуси аскарларни буюк саркардининг руҳи қўллашга шубҳа йўқ.

Тадбирда концерт дастури ва театрлаштирилган то-мошалар намойиш этилди. Хиёбонда бошланган тад-бир Темурийлар тарихи Давлат музейида давом этди.

Ўзбекистон Бадий академияси Марказий кўргаз-малар залида Тошкент шаҳри ҳокимлиги билан ҳам-корликда ташкил этилган "Буюк Соҳибқирон сиймо-си ўзбек рассомлари ижодида" мавзуйидаги кўргаз-

мада 30 дан ортик асарлар намойиш этилмоқда.

- Мустақиллик туфайли мамлакатимиз тарихи ва маънавий-маданий меросимиз чашмалари қайта кўз очиб, ўтмишда ўчмас из қолдирган аждодларимиз номий тикланаётганлиги қувонарлидир, - деди санъ-атшунос Умия Ҳакимова "Туркистон-пресс" муҳбири-га. - Академик Йигитали Турсунназаров бобомизнинг Тўхтамишхон устидан қозongan ғалабасини, Алишер Алиқулов, Эркабой Машраповлар эса ўз асарларида Амир Темури олиб борган муҳорабалар жараёнларини акс эттиришган.

Кўргазмадаги асарларда буюк бобокалонимизнинг улғвор сиймоси, ҳам саркарда, ҳам давлат арбоби сифатида, бутун буй-баста билан акс этган бўлиб, то-мошабин мўқаламнинг сеҳри кучидан лол қолади.

"Баҳор" концерт залида Соҳибқирон Амир Темури таваллудининг 665 йиллиги муносабати билан респу-блика Маданият ишлари вазири, М.Турғунбоева но-мидаги "Ўзбекракс" миллий рақс бирлашмаси Ўзбе-кистон халқ демократик партияси билан ҳамкорлик-да "Темурий маликалар" рақс-спектакли тақдироти-ни ўтказди.

- Тарихдан маълумки, Соҳибқирон Амир Темури-нинг рафикаси Сароймулкхоним (Бибихоним) гарчи ўла-ри фарзанд кўрмаган бўлса-да, лекин темурийзода-лар Шоҳрух Мирзо, Халил Султон Мирзо ва Улғбек Мирзоларнинг тарбиясида катта рол ўйнаган,- деди "Туркистон-пресс" муҳбирига "Ўзбекракс" миллий рақс бирлашмасининг бош директори, Ўзбекистонда хизмат кўрсатган артист Юлдуз Исматова - Ушбу рақс спек-таклида биз Бибихоним ва Шодимулкхоним каби тарих-да чукур из қолдирган Темурий маликаларнинг сиймосини яратилган муваффақ бўлди.

Ю.Исматованинг таъкидлашича, рақс-спектаклдаги сахналарда "Тановар" ва "Зарафшон" рақс ансамб-лари раққосалари иштирок этдилар.

- Бирлашмаси жамоаси илгарилари Меҳрибонлик уйларида бориб, ўз концерт дастурларини намойиш этардилар, дея сўзида давом этди Ю.Исматова. - «Онлар ва болалар йили» муносабати билан Ўзбеки-стон Халқ Демократик партияси пойтахтимиздаги кўпгина меҳрибонлик уйлари тарбияланувчиларини бугунги томошани кўришга таклиф этди ва бунга бош-қош бўлди.

Мазкур спектакл мусикаларини Ўзбекистонда хиз-мат кўрсатган артист Алишер Икромов танлади. Асар либреттоси ва хореографияси Юлдуз Исматова то-монидан яратилди.

"ТУРКИСТОН-ПРЕСС"

БУ КУНЛАР - БИЗНИНГ КУНИМИЗ

Ватан. Оила. Ижод.

- Бу кунлар - бизнинг кунимиз, - дейди шоир, таржимои Мирасиз Абзам Ўзбекистон озодлигининг ўнинчи баҳори ҳақида гапиратиб. - Ҳақиқатан ҳам "Туйғулар", "Ҳақиқатнинг кўзлари", "Бир чўнтак ёнғоқ" каби шеърини тўпламларида шоир Ватан азизлигини соғиниб шеърлар ёзганди. "Ога, сизга не сўрасангиз берман, аммо тилимни бермайман", - дея саксонинчи йиллардаёқ ўзбек тили шаъни учун ку-

рашувчилар сафида бўлганди. Шоир бугун ҳам ушундай катта курашувчанлик руҳи, самимият билан ижод қилмоқда. "Қирқ болага қирқ савол" шеърини тўплами яқинда нашр этилди. Қутлибека Раҳимбоевани муштарийларимиз аёл қалбининг турфа кечинмалари акс этган шеърлари, куйинчак мақолалари орқали яхши танишди. - Тоғ тоғ билан учрашса, тошлар ҳақида сўх-

батлашишди, - дейишди. Ижодкорлар оила-сида ҳам бахт ва қувончдан яралиётган адабиёт, санъат ҳақида кўп гап бўлади. Шу боис Абзамовлар оиласининг фарзандлари 14 ёшли Орзу ва 11 ёши Нажотда ҳам адабиётга мойиллик бор. Бу оила юртимиздаги мустақиллик боис ўз имкониятларини кашф этган кўп оилаларнинг бири.

"СЕНИНГ ҚАРИЧИНГ УНДАН КАТТА ЭМАСМИ?"

Тўғри, унинг сочлари оппоқ, Лекин сочин оқартган қайғу - бир миллатнинг қора қайғуси.

Тўғри, унинг кўзлари хира, Лекин кўзим равшан бўлсин деб - Жигарининг қонин ичмайди.

Тўғри, унинг кўллари кучсиз, Лекин қувват, мадор тиланиб душманига очмайди кафтин.

Тўғри, бели, оёғи майиб, Лекин ёлғиз Оллоҳ олдида букилади, тушади чўкка.

Ўзгаларга узалса агар, ундан ошиб кетиб қаричим бармоқларим... чопиб ташларман.

ЎЗБЕКИСТОН. БАҲОР

Куёш - бир меҳрибон: тоғларнинг бўйига минган муз - юкни охишта итариб туширди.

Лолалар ақли: анорранг кўйлақлар кийиб, тошларнинг кўрimsиз жойларин яширди. Ялпиз куюнчак: икки қирғоқ аро сиқилмасин деб, тўпланиб келишди сувнинг қошига.

Дарахтлар бир ахил: шавқ билан кўлига тизган гулларин баравар кўтарди бари бошига.

Қизғалдоқ журъатли: томларнинг устига югуриб чиқиб, шамолда йиқилмай турибди кулиб.




Булутлар фидойи: марварид, дурларин ташлади, ўткир чакмоқ билан кўксини тилиб.

Ер қаттиқ қувонди, унинг қувончи Юзига ёйилди бўлиб гул, чечак. Шунчалар яхши бу ўлкада энди Энг яхши одамлар яшаши керак.

БИЛМАГАН ЭКАНМАН...

Билмаган эканман симларни... Сасингиз келтирди мен билдим: Хушдарак бўларкан бу симлар. Кўёшли кунлари тепада Камалак бўларкан бу симлар. Қалдирғоч чиройли тизилса, Кўзминчоқ бўларкан бу симлар. Шабода торларин чертганда, Хушчақчақ бўларкан бу симлар. Билмаган эканман қоғозни... Бахт, иқбол бўларкан бу қоғоз. Кўнглимнинг кечасин ёритар Бир ҳилол бўларкан бу қоғоз. Сўзингиз суврати бинафша, Бинафшазор бўларкан қоғоз. Дил куйганда кўз билан кирсанг, Салқин диёр бўларкан қоғоз. Билмаган эканман мўъжизаларни... Қутлибека РАҲИМБОЕВА, Ўзбекистонда хизмат кўрсатган маданият ходими



Суратда: Шоирлар Мирасиз Абзам ва Қутлибека РАҲИМБОЕВА фарзандлари Орзу ҳамда Нажот билан.

НОМАРДЛИК

Таътилга чиққанамиздан буён ҳар куни эрталаб соат тўрт яримда уйғониб стадионда югураман. Чунки, маҳалладаги ўртоқларим билан иккига бўлиниб роса футбол ўйнаймиз.

Бугун ҳам энди ўйнашни бошлаган эдик, нариги командада ўйнаётган Дилшод оёғимга бир тепди. Оёғим қаттиқ оғрий бошлади. Аммо, мен барибир уйинни тўхтатмадим.

Ўзимга-ўзим "сен кучлисан, оёғинг сира ҳам оғримаяпти", - дея ишонтирдим. Чунки, оёғим оғрий уйинни тўхтатсам кучимиз камайиб, енгилиб қолишимиз мумкин эди-да. Мен командамизнинг ҳужумчиси эдим.

Бор кучим билан ўйнаб икки марта тўп урдим. Биз ютдик. Уйин тамом бўлгач, оёғим жуда қаттиқ оғрийганига чидалмай, ўтириб олдим. Оёғим чиқиб ҳам кетган экану, жон-жаҳдим билан ўйнаётганим учун сезмаган эканман.

Атрофимни ҳамма ўртоқларим ўраб олишганди. Дилшод эса... сал нарида бир ўзи турарди. У номардлик қилди, шунинг учун ҳам унинг командаси ютқизди.

Нажот АБЗАМОВ

Ишқ ила лиммо тўла кўнглим ҳамон, Биргина шу ишқ ила жоним омон.

Кетса ишқ бир дам агар ташлаб мени, Кўнглимнинг осмонини босгай тумон.

Ўйлама: бу шунчаки жодули сўз - Кетса ишқим, борлигим бўлгай гумон.

Севгисиз асло яшашни истамам, Минг тарафдан менга ўқ отсин камон.

Менга ҳеч бир қаршиликдан фойда йўқ, Мен биландир жонгинам - янги замон!

Кимки мени айро этса севгидан, Шубҳасиз бўлгай анинг ҳоли ёмон.

"Мирасиз Абзам! Севиклинг ким?" дегин, Бу - Ҳақиқат, кўзлари оҳусимон.

Чекингдаги ўртоқ мен бўлажакман, Этингдаги тирноқ мен бўлажакман.

Азалдан то абад юз йил, минг йиллар, Юзларинга муштоқ мен бўлажакман.

Агарда ухламоқ истарсанг ухла, Бошингдаги уйғоқ мен бўлажакман.

Ёвларинг кўпайса, сени бундан-да, Кўчлантиргич байроқ мен бўлажакман.

Адашсанг боши берк кўчалар ичра, Йўл кўрсаткич бармоқ мен бўлажакман.

Айро кетар бўлсанг менсиз йўлларга, Рухингдаги чарчоқ мен бўлажакман.

Амиринг, азизинг, аъзаминг менман, Умрингда сўнг чакмоқ мен бўлажакман.

САБР

"Сабр таин - асмин" - dono konda, Шунга амак қилиб лотин билалар, Аяно унда қандайдир иллар, Биринчи селарини юзди.

Асқад МУХТОР

Сабр - икки қадам ортга чекинкам, Бир қадам олгаси турар олдинда. Сабр - шабнам бўлиб ўтларга инмоқ, Эзгу орзуларни авайлаш қинда.

Сабр - кунлар бўйи нажот кидириб, Охири кашф этмоқ ёруғ тонларни. Фафлат зарротларин қалбдан сидириб, Ватанда яратмоқ қаҳқашонларни.

Сабр иллат эмас. Ҳақиқий сабр - Тупроқлар бағрида яшовчи қудрат. Софлик боғин қураб гудураб ахир - Сабрнинг олтини шундан иборат. Мирасиз АБЗАМ



«КЎШДАРАХТ» Орзу АБЗАМОВА чизган сурат.

ЭЛ АРДОҒИДАГИ ИНСОН

Ўзбекистон Халқ Демократик партияси Марказий Кенгашида адабиёт ихлосмандларининг Ўзбекистон Халқ шоири Абдулла Орипов билан учрашуви ўтказилди. - Шоирни билмаган ким бор. Унинг шеърлари ҳар бир ўзбек хонадонига кириб борган. У Давлат мадҳиясини яратган ижодкор сифатида ҳам машҳурдир. - деди Ўзбекистон ХДП марказий

Кенгашининг биринчи котиби Абдулҳафиз Жалолов "Туркистон-пресс" муҳбири билан суҳбатда. - Абдулла Орипов ватансевар, халқсевар, эрк куйчиси сифатида элга танилган ижодкордир. У партияимизнинг таниқли фаолларидан бири, Марказий Кенгаши сийосий ижроия кўмитаси ва Олий Мажлисдаги фракциясининг аъзоси ҳамдир. Унинг шеърлари

доимо севиб муталаа қилинган. Эртанги куннинг адабиёт ихлосмандлари ҳам худди шундай иштиёқ билан ўқишига шубҳа йўқ. Учрашувда "Истиқбол" ижодкор ёшлар клуби аъзолари шоир шеърларидан намуналар ҳамда ўзларининг Абдулла Ориповга бағишланган шеърларини ўқидилар, санъаткорлар шоир шеърлари билан айтадиларини қўшиқларни ижро этдилар.

ҚИЗҒАЛДОҚ СОҒИНЧИ

Айни кўклар қизғалдоқ сайлига чиққанмисиз?

Табиат гўзал, сизни ўзига ром этди. Шу чоғ қўлингизга шеърини тўплам тушиб қолса-чи. "Зарафшон" наشريёти ўз муҳлисларига ана шундай баҳор кайфияти-ла яратилган янги мажмуани тақдим этди. Муаллифи Дилмурод Санжар (Исхотас). Тўпламининг беш юз нусхаси сиёҳи кўри-

масданоқ сотилиб кетди.

- Буни ўзим ҳам кутмагандим, - дейди муаллиф "Туркистон-пресс" муҳбири билан суҳбатда. Бизнингча, асосий гап ўттиздан ортиқ шеърларни ўзида жамлаган китобнинг лотин ва қириллача ҳарфларда чиқарилганида. Уни катталар қатори талабалару мактаб ўқувчилари, барча муталаа қилиши мумкин.

«ТУРКИСТОН-ПРЕСС»

